

北京舊志彙刊

〔康熙〕
順天府志

十五

請酌復進取舊額疏

蔣超

題爲請酌復進取舊額，以鼓勵人才事。臣聞先臣張瑛有言，人才氣運，相爲消長，不可預爲額數。蓋有無才之日，尚思多方設法以羅致之，未有人才正當極盛，反拘泥常格，不大開功名之路，以延納之也。我國家以制科取士，二十餘年，化育弘深，人才繁盛。順治初年，歲科兩試，每次大學入學多至五六十名，嗣後漸減漸縮，府學二十名，大學十五名，小學八名、六名不等，又并歲科爲一考，雖由慎惜名器之意，然查近來各學屢經

歸并，如河間府學，將長蘆運司、河間衛、忠順童三處歸并矣。青縣學，將典、濟、彭城守禦三處歸并矣。永平府學，將遼學、永平衛二處歸并矣。延慶州學，將永寧、懷柔二處歸并矣。其兩學并爲一學者更多。又初定大、小學時，有司恐一當大縣，凡大兵供億，夫馬支應，俱比隣邑加增數倍，寧認中、小，不肯注爲大學。如保定府之束鹿縣屬祁州，高陽縣屬安州，何以縣稱大學，州反稱中學。廣平府之邯鄲，糧里多於肥鄉；真定府之柏鄉，賦役衝煩，十倍隆平、寧晉；何以邯鄲、

柏鄉爲中，不得與肥鄉、隆平、寧晉并稱大學。諸如此類，難以枚舉。最苦者，順天一府向時止是漢人考試，每次尚入一百二十名，今增入八旗，滿洲、蒙古、漢軍，以千餘名之童生，共取六十五名，人多數少，進取萬艱。前臺臣何元英亦嘗言之，未蒙恩允廣額。比臣考後咨呈禮部，祈請代題，蒙部劄付臣，云已經題定，毋容再議。語云：琴瑟不調者，必改而更張之，況進取數目。奉有世祖章皇帝初年定額，今誠取舊章，一率由之，使各州縣大、小學重新酌定，量增取額，網羅恢廣，才

智奮庸，成周菁莪，櫟棫之盛，不難再見於今日矣。

請停有司責生員疏

蔣超

題爲請停有司責禁生員之例，以培養士氣事。臣聞士爲四民之首，國家元氣所繫，培養之則振拔惕勵，人知自愛。摧折之則卑污垢賤，萎靡不振，甘心流入於匪僻而莫之愧。是士之節義、廉耻，實待上有以養之也。順治八年三月，欽飭《學政全書》明載有「府、州、縣提調官員宜嚴束生徒，除干謁瀆擾外，俱宜以禮相待，勿得橫

肆凌侮」一款，令甲昭然。仰見國家待士之重如此，蓋欲長養教育，使其砥礪廉隅，愛惜名節，厚樹人材，以備將來任使也。自不肖子衿抗糧逋課，始有奏銷黜革之例。康熙元年二月，科臣徐惺條奏，嗣今生員劣行，有司即行提審斥革，照民律一體處分。奉旨依議，欽此欽遵。誠以士子沐浴皇恩經年，教養不思報答高厚，自蹈法羅，雖日置之桁楊夏楚，亦復何辭。但亦有有司任情喜怒，率意加刑。如獲鹿縣生員蔡滌父子以地土小事，與人訐告，爲真定府同知鄭章屢次夾打，已成

殘廢矣。廣宗縣生員呂之翕父子爲糧廳衙役需索酒食不遂，鎖禁南和獄中矣。滄州生員呂純以仗完錢糧二兩有餘，向經催王分春取討不還，反稟州官將呂純重責矣。慶雲縣生員姚之佐、趙廷忭、崔呈祥以鬥毆私事，被縣官胡一蛟申作破城大盜，未經解審，俱夾打絕命矣。有司視士子如仇，士子見有司如虎，尋常雀鼠之爭，不行申報，輒行蜚楚。臣每閱一申詳，有泪在喉，挽救無術。切念書生體質脆弱，產業貧寒，鞭朴動致傷生，繫獄誰爲進食，畿輔密邇神京，幸得爲朝廷赤子，又

係聖賢子弟，雖其中有賢不肖之殊，而以我皇上如天好生之心，視之決不忍使其無辜受辱，慘毒反過於齊民也。臣請嗣今以後，果有真正抗糧窩盜不公不法者，先行報臣衙門褫革，然後審理。如或申報不及，欲行朴責，亦須傳知教官，公同審鞫，若以師傅責弟子然，似猶有以禮訓士之意也。

請盛興教化疏

張吉午

題爲盛興教化，以隆聖治事。竊惟古帝御宇，安之即教，如三代典制，夏曰校，殷曰序，周曰庠。建首善自京師始，由內及外，遍於郡縣。以

及三老之設，凡所以敷教也。故彝倫昭著，禮讓成風，乃知盛世綿遠之本端在教化耳。我皇上稟睿自天，道鏡今古，自群孽煽逆，仰見聖策風行，神謀電發，垂拱廊廟，蕩滌妖氛。今已九服咸寧，百揆時叙，臣愚以爲盛興教化，正不容緩，據理以考証於前踪，因時以酌新於睿慮，迨教興化洽，俗厚民淳，奚止三代之美哉。然皆宸衷之所洞悉，臣似屬於贅言。但臣重荷寵遇，謬廁卿尹，欲闡帝猷，光宣於外，蟻忱時切，凜志自矢。前於六月十二日到任，即行祈雨。例凡耆老供事齋壇，豈

首善之地祇有一人而已。蓋耆老者，即古三老之遺意也，確選年高而有德，使之各於鄉里講論禮義，誘迪群蒙，此向來天下通設，誠庠序學校之一佐也。似此寥寥，則鄉里群蒙竟無誘迪可知，是即敷教之典多所闕略。臣已疊行治中，轉行五城，與大、宛二縣秉公察選，務不致國家盛典聽成虛套。然臣細訪至今，乃始得寥寥之故何者，耆老原有頂帶，而頂則牛角爲之，僉以畜角表冠，儀瞻不雅，所以齒德之輩，一經察選，並含羞深避，即以衰廢爲辭。夫以國家盛典而衆情不願，頗於

推廣教化有相關碍也。謹請特恩，將耆老帽頂牛角以錫鑲，庶幾加優齒德，鼓舞善良，則輦下之耆老叨榮，而天下之爲耆老者盡叨恩榮。夫然後自無含羞深避、衰廢爲辭，而舉世之羣蒙俱有誘迪，洵於彝倫之著，禮讓之風，不無小補。且臣之所欲光宣帝猷，或於此藉以稍竭蟻忱，更且載在典章，傳之萬世，知皇上之心崇教化，纖悉必周。子孫效法，則世世之教化克崇，而世世之雍熙無異。雖綿遠之本不全在耆老，而至纖者亦周，因使百爾臣工，共仰皇上。義既撥亂，仁遂敦化，自莫不

以厚風俗、正人心爲己任耳。至於鄉飲一典，無非勸善，總是教化中之一端。近係軍興，緣概暫止，今時既升平，均宜自京師所屬郡縣，以及各省郡縣，敕復舉行，要皆所以佐隆聖治，亦不容姑緩者矣。臣職任牧民，躬逢泰運，切念綿遠之本教當急興起見，不揣鄙陋，冒昧瀆陳，貼黃難盡。如果可采，伏乞皇上全賜睿鑒，敕部議覆施行。奉旨，該部議奏，隨經禮部議覆，查定例內開耆老用烏角頂，今既據該府尹疏稱畜角表冠，儀瞻不雅，相應更以錫頂，通行直隸各省，一體欽遵等因，康熙二

十一年十一月初十日題，本月十四日奉旨依議。

又經戶部議覆，查直隸等省裁過鄉飲錢糧，相應自二十二年起支給。通行直隸各省可也。康熙二十二年正月二十六日題，本月二十七日奉旨依議。

請豁年遠無征地價疏

張吉午

題爲殘黎委實困苦，地價萬難追征，再籲聖慈大沛天恩事。竊惟皇仁普洽，有加無已，畿民沐澤，更極高深。然而尚有最慘之餘隱，關乎多命。臣不敢避嫌瑣瀆，再爲皇上陳之。茲如大、宛兩縣

地價一案，前任府尹臣熊一瀟目擊哀號。備稽前府尹臣徐世茂、耿效忠、宋文運歷案，具有一地價無征等事」一疏。欽遵恩旨豁免外，所有前任府尹臣耿效忠查報量能，承認原價、半價地價銀三千三百二十餘兩，內據大、宛二縣向報追過銀一千六十二兩九錢一分，戶部札豁免銀四百四十兩，仍未完銀一千八百二十三兩四錢八分在案。臣於本年六月十二日到任，閱此未完，首即疊催大、宛二縣速追完解去後，今據大興縣知縣張茂節署宛平縣事，大興縣知縣張茂節各詳俱，以死逃餘丁伶仃如

洗，爲民哀懇援赦各等情到臣，臣任日淺，未敢輕信，復自察訪，其慘果真。臣緣思此案未完零星地價，自遭地震，房頽戶塌，殘喘老幼，皮骨僅存，委係追無可追，變無可變。若再嚴征，徒累多命，終不能完。況我皇上愷惠性成，愛民若保赤，伏讀恩詔內開十七年以前民欠錢糧、稅銀及帶征錢糧，該督撫查明，保題到日豁免。是皇上之深仁若此，而臣奉命牧民，豈可蒙蔽下情而不入告乎。且直隸本年地丁、錢糧俱已盡蠲，則零星年遠地價較更可矜。伏乞聖慈垂憫，大沛天恩，正與詔款相符。一

赦有限之未完，即活伶仃之多命矣。緣睹流離煢獨，據實陳情，仰祈睿鑒，敕部議覆施行。奉旨，該部議奏，隨經戶部題覆前項，無追地價。既經該府尹援詔請免，相應準其豁免可也。康熙二十一年十一月十七日題，本月十九日奉旨依議。

請換貢院號房瓦椽疏

張吉午

題爲目擊號房之新葺，因查請修之舊案，據實上陳，仰祈聖鑒事。竊惟賓興鄉薦，三年一舉，科場制度，實隆且備。臣奉命叨尹順天，適逢其會，緣勉力以效理諸務，誠心幸大典之獲預也。惟是

貢院一項，每科甚費修葺，臣今日親巡，促切期整固，奈目及號房，苦蓋席止單層。夫號房者，士子存身作文之所，聖主愛賢之德澤，儒生苦志之燈窗，尤在於此。倘陰雨驟沛，則滲漏難支。其上負宸衷之盛意，深爲悚懼。臣即面詰大、宛兩縣官吏，乃齊稱錢糧核定，歷科例止單席。臣默思其言，自不便臨期破例，妄爲苛刻也。但順天鄉試在於皇都，貢院則士子號房，豈容因循積陋，反不若外省之整固。此康熙十一年，臺臣張問政所以有請換瓦椽之疏，部臣遂奉旨約估，迨軍興需餉，而